

*Perqué tout blanc rèsto un fuiet eici?  
Es pèr que digue au leitour: Gramaci!*

## **CANT PREMIÉ**

### **1**

#### **Pèr Raport i Fenèstro**

Moun rèire, un jour, diguè: — Perde la visto!  
Qu'avié segur pèr aqui nonanto an.  
Lou mége alors: — Déurias belèu, ma fisto,  
Jamai bèure de vin, au mens pas tant.  
Èu s'escrichè — Pèr raport i fenèstro,  
Voulès d'un cop metre l'oustau à cra?  
Noun, anen plan e Diéu decidara.  
Veiren sus iéu se sa man s'encaufèstro.  
— E jusqu'au bout reste gaboi e siau.  
Iéu porge eici ma darrièro menèstro;  
Posque coumo éu m'engarda di gros mau  
E m'esvalj d'un sourrire finau.

### **2**

#### **Aventuro d'un Aut-de-Formo**

Aquelo fes au burèu venguè d'ouero,  
Muscaïl, e ço que pourtavo acatè;  
Pièi Vounvounet rèn de tèms s'assetè;  
Flast à la fin rampelè sai pas quouro,  
Flast, un vièi tipe estrange, emperruca,  
Couifa d'un tube à soun goust fabrica,  
Toustèms dempièi trento an d'uno manière  
Qu'en Avignoun n'ia ges d'autro parièro.  
Un tube grand, soulenne, espetaclous,  
Dret davans eu sus de cartoun poussous;  
Flast d'abord planto à soun nas si luneto;  
S'alisco après, bounetoun e mancheto.  
Silènci lourd. S'escapè Vounvounet  
Qu'avié de vèire un chèfe e plan-planet  
S'encaminè deforo pèr l'atèndre.